

TXOJ KEV NPAJ YUAV MUS HAVV
LUB TUAM TSEV
DAWB HUV



TXOJ KEV NPAJ YUAV MUS HAUV
LUB T U A M T S E V
D A W B H U V

Phau me nyuam ntawv no tau muab txhais
los ntawm Lub Tuam Tsev Dawb Huv
los ntawm Boyd K. Packer

daim plhaub tom ntej: Salt Lake lub Tuam Tsev
daim plhaub tom kawg: Laie Hawaii lub Tuam Tsev

© 2002 los ntawm Intellectual Reserve, Inc.
Ceev txhua txoj cai
Luam tawm hauv Teb Chaws Amelikas

Pub txhais ua lus As Kiv: 8/02
Pub txhais ua lus Hmoob: 8/02
Kev txhais *Preparing to Enter the Holy Temple*
Hmong

MUS RAU LUB TUAM TSEV

Muaj ntau lub ntsiab uas qhia yog vim li cas yus thiaj xav mus rau lub tuam tsev. Sab nraum lub tuam tsev twb qhia me ntsis txog nws tej ntsiab ntawm sab ntsuj plig. Haj yam pom li no rau sab phab ntsa sab hauv. Sab saum lub tuam tsev lub qhov rooj muaj cov lus uas hais tias “Kev Dawb Huv rau tus Tswv.” Thaum koj nkag mus rau hauv ib lub tuam tsev twg uas tau txais kev thov Vajtswv fij rau lawm, koj yeej nyob hauv Vajtswv lub tsev ntag.

Nyob hauv lub Koom Txoos no peb ua ntau hom tsev. Nyob hauv cov no peb pe hawm, peb qhuab qhia, peb muaj kev ua si, peb txhim tsa. Peb txhim tsa tau tej ceg txheem ntseeg thiab pawg ntseeg thiab qhov chaw tshaj tawm txoj moo zoo thiab tej pawg thiab tej Koom Haum Niam Tsev hauv cov no los yog hauv tej tsev peb xaub. Tiam sis, thaum peb txhim tsa tej yim neeg raws li tus Tswv tau qhia tseg, peb txhim tsa lawv hauv cov tuam tsev. Kev sib yuav hauv lub tuam tsev, txoj kab ke sib khi no, yog txoj koob hmoov tseem ceeb tshaj uas koj yuav tau hauv lub tuam tsev dawb huv.

Nyob hauv cov tuam tsev cov mej zeej ntawm lub Koom Txoos uas tsim nyog ua tau tej kab ke tseem ceeb tshaj ntawm kev cawm dim uas tau tshwm sim los rau noob neej. Nyob hauv ib txoj kab ke dawb ceev, ib tug neeg yuav raug kev ntxuav thiab kev pleev roj thiab kev qhuab qhia thiab kev txais lub vaj txiaj ntsim thiab kev sib khi. Thiab thaum peb tau txais cov koob hmoov no rau peb tus kheej, peb coj ua tau rau cov tuag uas tsis tau muaj tib lub cib fim no. Nyob hauv cov tuam tsev muaj tej kab ke dawb ceev no rau cov ciaj thiab cov tuag tib si. Qhov no yog lub dab ua kev cai raus dej, hauv no luag ua kev cai raus dej sawv cov tuag cev, cov mej zeej tsim nyog sawv tam cov uas twb mus dhau daim ntaub thaiv lawm.

“Mus rau lub tuam tsev.” Yog tias tsis mus tam sim no, cia li mus tsis ntev saum no. Rau siab thov Vajtswv, kho koj lub neej, khaws nyiaj txiag xwv kom ib hnub tom ntej koj mus tau. Tam sim no cia li pib taug txoj kev hloov siab lees txim uas feem ntau yuav nyuaj heev. Lub tuam tsev pauv tau ib tug neeg thiab yog ib txoj kev tsim nyog siv zog taug mus. Rau cov uas nyob deb ntwam ib lub tuam tsev, nyaj cov tuam tsev yuav los rau koj ua ntej koj mus rau cov tuam tsev. Rau siab ntseeg thiab cia siab tias koj yeej yuav mus—tias koj yuav tsim nyog thiab tias koj yuav mus rau lub tuam tsev.

TEJ NO YEEJ DAWB CEEV

Thaum ua tib zoo nyeem vaj lug kub yus pom tias tus Tswv yeej tsis tau qhia txhua yam tsav rau txhua leej txhia tus. Yeej muaj tej yam uas yus yuav tau ua tso mam li txais tau tej xov xwm dawb ceev. Lub tuam tsev tej kab ke yeej yog ib yam zoo li no.

Peb tsis tham txog lub tuam tsev tej kab ke sab nraum cov tuam tsev. Twb tsis tau npaj tseg tias yuav tsuas qhia txog lub tuam tsev tej kab ke rau ib co neeg tsawg tsawg xwb xwv kom lwm leej lwm tus yuav kawm tsis tau txog tej no. Tab sis mas yeej tsis xav kom muaj li ntawd. Peb yeej rau siab ntso yaum txhua tus neeg kom lawv npaj thiab kom lawv tsim nyog mus ua tej hauj lwm hauv lub tuam tsev. Cov uas twb mus rau lub tuam tsev lawm tau kawm lub tswv yim uas hais tias: Yuav muaj ib hnub twg uas txhua tus neeg uas muaj sia nyob thiab txhua tus neeg uas tau nyob hauv lub ntiaj teb yuav muaj lub cib fim los mloog txoj moo zoo thiab txais los sis tso tej uas lub tuam tsev qhia pov tseg. Yog tias muab lub cib fim no tso pov tseg, ces tus neeg ntawd yuav tsum lav txoj kev pov tseg ntawd.

Tej kab ke thiab kab li kev cai hauv lub tuam tsev yeej yooj yim. Lawv zoo nkauj heev. Lawv dawb ceev. Yuav tau khaws cia zoo zoo tsam cov uas tsis tau npaj txaus ho paub txog lawm thiab. Kev xav paub txog tej no tsis yog kev npaj siab txais yuav. Kev xav kawm txog tsis yog kev npaj siab txais yuav thiab. Txoj kev npaj txais yuav tej kab ke yog ua tej them no: kev ntseeg, kev hloov siab lees txim, kev cai raus dej, kev pom zoo, kev tsim txiaj, kev coj kev cai laus thiab kev rau siab ntso yog tej yam tsim nyog rau ib tug neeg uas tau raug caw los ua ib tug qhua hauv tus Tswv lub tsev.

Peb yuav tsum npaj kom txaus ua ntej peb mus rau lub tuam tsev. Peb yuav tsum tsim nyog txaus ua ntej peb mus rau lub tuam tsev. Kuj tau tsa tej kev txwv thiab kev cai lawm. Tus Tswv yog tus tsa tej kev txwv thiab kev cai no tsis yog tib neeg tsa. Thiab tus Tswv muaj peev xwm thiab txoj cai kom koj qhia tej xwm hauv lub tuam tsev xwv kom tej no yuav ceev kom dawb ceev thiab tsis qhia txhua leej txhia tus.

Txhua tus uas tsim nyog thiab tau npaj txhij lawm mus tau rau hauv lub tuam tsev, nyob ntawd lawv yuav kawm txog tej kev teev thiab tej kab ke dawb ceev.

TSIM NYOG NKAG MUS HAUV

Thaum koj to taub tias cov koob hmoov ntawm lub tuam tsev tseem muaj nuj nqis li cas thiab paub tej kab ke ua hauv lub tuam tsev dawb ceev npaum li cas, koj yuav tsis hais li cas txog txoj kev cai uas tus Tswv tau tsa rau cov neeg uas xav nkag mus rau hauv lub tuam tsev dawb huv.

Koj yuav tsum tuav ib daim ntawv tso cai uas tsis tau tag kom koj thiaj nkag mus tau hauv lub tuam tsev. Tus npis sov hauv koj pawg ntseeg thiab ceg txheem ntseeg tus thawj tswj hwm yuav tsum sau npe rau daim ntawv tso cai. Thiab nyob ntawm qhov chaw tshaj tawm txoj moo zoo, ceg ntseeg tus thawj tswj hwm thiab tus thawj tswj hwm ntawm qhov chaw tshaj tawm txoj moo zoo muaj ntiag tug hauj lwm ua cov ntawv tso cai nkag hauv tuam tsev. Tsuas yog cov uas tsim nyog thiaj mus tau hauv lub tuam tsev xwb. Tus npis sov muaj ntiag tug nug seb peb puas tsim nyog mus. Txoj kev xam phaj no yog ib yam tseem ceeb heev rau koj txoj kev ua mej zeej hauv lub Koom Txoos, vim qhov no yog lub sij hawm uas koj yuav nrog tus Tswv ib tug tub qhe ntsuam xyuas koj lub neej saib zoo li cas tiag. Yog hais tias muaj dab tsi hauv koj lub neej uas tsis zoo, tus npis sov muaj cuab kav pab koj kho qhov ntawd. Nyob ntawm qhov no, thaum koj muaj kev ntuas los ntawm tus txiav txim ntawm Ixayees, koj tshaj tau los sis txais kev pab kom tsa tau koj txoj kev tsim nyog nkag mus rau hauv lub tuam tsev nrog tus Tswv kev pom zoo.

Thawj Tswj Hwm N. Eldon Tanner, uas tau ua tus Pab Cuam Thib Ib hauv Thawj Pawg Thawj Tswj Hwm, tau hais lus hauv lub tuam rooj sab laj rau cov uas tuav lub pov thawj

hwj txog kev xam phaj. Nws txoj kev ntuas tseem ceeb rau lub Koom Txoos cov thawj coj uas coj kev xam phaj thiab rau cov neeg uas yuav tau mus xam phaj ntawd tib si. Ua tib zoo xav txog txoj kev ntuas no:

“Nyaj nej cov npis sov thiab ceg txheem ntseeg cov thawj tswj hwm yuav coj kev xam phaj rau daim ntawv tso cai nkag hauv tuam tsev zoo li nram no:

“Koj tau los cuag kuv yuav txais daim ntawv tso cai rau koj nkag mus hauv lub tuam tsev. Kuv muaj ntiag tug hauj lwm sawv tus Tswv cev thaum kuv xam phaj koj. Thaum xaus kev xam phaj no muaj ib qho chaw rau kuv sau npe rau koj daim ntawv tso cai; tiam sis kuv lub npe tsis yog tib lub npe tseem ceeb rau ntawm koj daim ntawv tso cai. Ua ntej daim ntawv tso cai muaj cai tiag tiag, koj kuj yuav tsum sau npe rau thiab.

“Thaum koj sau npe rau koj daim ntawv tso cai, koj cog lus rau tus Tswv tias koj tsim nyog txais yuav tej koob hmoov uas cov uas tuav ib daim ntawv tso cai yuav txais. Muaj ntau lo lus nug uas kuv yuav nug.... Koj yuav tsum ua siab dawb teb txhua lo lus nug.”...

“Nim no, tom qab nej tau nug tus neeg ntawd cov lus nug no tas lawm, tej zaum nej yuav xav ntxiv ib co lus zoo li nram no: “Ib tug neeg twg uas mus hauv tus Tswv lub tsev yuav tsum tsis txhob muaj ib yam dab tsi *tsis huv, tsis dawb, tsis ncaj, los sis tsis coj cwj pwm zoo.*”...

“Peb tej kev xam phaj yuav tsum coj ntawm kev hlub, thiab kev hais lus zoo. Feem ntau nej kho tau txhua yam yog nej nug hais tias: ‘Puas muaj dab tsi uas ua rau koj xav tsis zoo los sis tsis ua siab dawb rau tus Tswv yog tias koj sau npe rau ntawm koj daim ntawv tso cai nkag hauv tuam tsev?’

“Koj puas xav tau me ntsis sij hawm kho tej yam hauv koj lub neej ua ntej yuav sau npe rau? Nco ntsoov tias, tus Tswv paub txhua nrho thiab yuav tsis raug kev luag thuam. Peb tab tom sim pab koj. Tsis txhob dag kom tau ib txoj hauj lwm, ib daim ntawv tso cai, los sis tus Tswv ib txoj koob hmoov.”

“Yog hais tias nej ua raws li tau piav saum no, tus mej zeej muaj ntiag tug hauj lwm yuav xam phaj nws tus kheej. Tus npis sov los sis ceg txheem ntseeg tus thawj tswj hwm muaj cai tau lub hwj chim ntawm kev paub. Nws yuav paub hais

tias puas muaj dab tsi tsis zoo uas yuav tsum kho ua ntej sau npe rau daim ntawv tso cai." ("The Blessings of Church Interviews," *Ensign* [Kaum Ib Hlis Ntuj 1978]: 42–43.)

Txoj kev xam phaj rau daim ntawv tso cai nkag hauv tuam tsev nyob ntawm tus npis sov thiab tus mej zeej ntawm lub Koom Txoos nkaus xwb. Nyob ntawm no tus mej zeej tau teb tej lus nug txog nws txoj kev coj ua neej, kev tsim nyog, thiab txoj kev muab siab npuab lub Koom Txoos thiab nws cov thawj coj. Tus neeg no yuav tsum qhia tseeb tias nws ua dawb huv thiab tias nws ceev Lo Lus Txawj Ntse, nws them tag nrho ib feem kaum, nws ua neej nrog nraim tej kev qhia hauv lub Koom Txoos, thiab nws tsis koom los sis muab siab npuab tej pawg neeg uas tau ncaim tawm lawm. Tus npis sov tau raug qhia lawm hais tias nws yuav tsum khaws tej xwm uas tus neeg raug xam phaj ntawd qhia nws rau hauv nruab siab thiab saib tej no ua tej yam uas nws hais tsis tau tawm.

Txoj kev teb tus npis sov tej lus nug yuav qhia tias yus tsim nyog txais daim ntawv tso cai nkag hauv tuam tsev. Yog tias ib tug neeg tsis ceev tej lus txib los sis yog tias muaj ib yam dab tsi hauv nws lub neej uas nws yuav tau kho, tus neeg ntawd yuav tsum qhia tias nws tau hloov siab lees txim tiag tiag tso nws mam txais tau daim ntawv tso cai nkag hauv tuam tsev.

Tom qab tus npis sov xam phaj li no tas, ib tug ntawm ceg txheem ntseeg pawg thawj tswj hwm kuj xam phaj peb txhua leej txhia tus ua ntej peb mus tau hauv lub tuam tsev. Yog hais tias zaum no yog thawj zaug peb mus, feem ntau yuav yog ceg txheem ntseeg tus thawj tswj hwm kiag uas coj kev xam phaj.

Nej yeej paub tias thaum nej mus xam phaj rau daim ntawv tso cai nkag hauv tuam tsev nej yuav zoo siab txais yuav nws txoj kev txiav txim vim nws twb yog tus uas raug tsa ua tus txiav txim hauv Ixayees, nws yeej muaj ntiag tug hauj lwm sawv tam tus Tswv thiab lav seb puas pom zoo nej nkag mus hauv qhov chaw dawb ceev no.

THAWJ ZAUG THIAB TXHUA ZAUS

Yog hais tias zaum no yog thawj zaug koj yuav mus rau hauv lub tuam tsev tej zaum koj yuav txhawj me ntsis. Peb ib txwm txhawj me ntsis txog tej peb tsis tau paub txog li. Feem ntau peb ntshai me ntsis txog tej yam tshiab.



ChavXilethi-aus, Vernal Utah lub Tuam Tsev

Cia li muaj kev thaj yeeb nyab xeeb. Koj tab tom mus rau lub tuam tsev. Yuav muaj ib tug coj koj kev hauv txhua qhov chaw. Koj yuav tau kev coj qhia zoo zoo—cia li muaj kev thaj yeeb nyab xeeb.

Thaum peb nkag mus hauv lub tuam tsev peb yuav tsum coj kev tswm seeb. Yog tias muaj lus sib tham peb yuav tau hais lus ntxhi. Thiab thaum muaj kev qhuab ntuas, peb yuav tsum nyob tswm seeb thiab ntsiag to kiag.

Nim no muaj ob peb qho chaw uas cia yus muaj caij nyob ntsiag to ntsuam xav txog ub no. Hauv tej lub tuam tsev ua ntej yus nkag mus hauv ua tej kab ke, tej pawg neeg los sib sau ua ke hauv chav pe hawm. Nyob no cov mej zeej tos txhua leej txhia tus tuaj txhij. Feem ntau hauv peb lub neej peb yuav laj tos li no. Yog yus yog thawj tug uas tuaj txog thiab yus tau tos kom tus kawg tuaj txog tso mam mus yuav ua rau yus npau taws me ntsis. Tiam sis tsis muaj li ntawd hauv lub tuam tsev. Luag saib tau lub sij hawm tos ntawd ua ib lub cib fim zoo. Qhov nyob ntsiag to tsis sib tham li thiab xav txog tej yam ntawm sab ntsuj plig yog ib lub cib fim zoo npaum li cas! Qhov ntawd ntxiv zog rau yus tus ntsuj plig.

Thaum koj mus rau hauv lub tuam tsev, nco ntsoov tias koj yog ib tug qhua hauv tus Tswv lub tsev. Nws yog ib lub sij hawm muaj kev xyiv fab, tiam sis txoj kev xyiv fab yuav tsum nyob ntsiag to. Tej zaum thaum muaj kev sib yuav hauv lub tuam tsev peb yuav tau hais kom cov kwv tij neej tsa thiab phooj ywg uas zoo siab thiab xav qhia lawv tsev neeg tias lawv tau sib nco npaum li cas, tias kom lawv hais lus ntxhi thiab nyob ntsiag me ntsis. Kev tham nrov nrov thiab kev luag nthu tsis tsim nyog nyob hauv tus Tswv lub tsev.

Cia li zoo siab ua raws li cov neeg ua hauj lwm hauv lub tuam tsev qhia. Yuav muaj ib tug neeg coj koj kev.

KEV QHIA LOS SAUM NTUJ LOS

Ua ntej mus rau hauv lub tuam tsev thawj zaug, los sis tom qab ntau zaus, ib qho uas pab tau koj yog tias koj to taub tias tej kev qhia hauv lub tuam tsev siv tej lub cim qhia lub ntsiab. Tus Tswv, tus Xib Hwb Zoo, tau qhia Nws tej kev qhia li no thiab.

Lub tuam tsev yog ib lub tsev kawm ntawv zoo. Nws yog ib lub tsev muaj kev kawm. Nyob hauv cov tuam tsev luag coj

tus cwj pwm zoo xwv kom muaj tau tej kev qhia txog tej xwm tseem ceeb ntawm sab ntsuj plig. Tus kws tshuaj John A. Widstoe uas tau tuag lawm uas yog ib tug ntawm Pawg Kaum Ob tug Thwj Tim tau ua ib tug thawj tswj hwm uas nto npe rau ib lub tsev kawm ntawv qib siab thiab ib tug kawm txawj kawm ntse uas nrov thoob ntiaj teb. Nws yeej saib lub tuam tsev tej hauj lwm rau nqi thiab ib zaug nws hais tias:

“Tej kab ke hauv lub tuam tsev qhia txhua nrho txog txoj kev cawm seej, yam li cov thawj coj ntawm lub Koom Txoos tau qhia tseg lawm, thiab pab yus to taub tej yam uas nyuaj to taub. Tsis muaj kev nkhaus los sis ntsuj tej qhia ntawm lub tuam tsev kom haum txoj kev cawm seej. Qhov uas lub vaj txiaj ntsim tej kev qhia muaj txhij txhua yog ib yam uas qhia tias tej kab ke hauv lub tuam tsev muaj tseeb tiag. Tsis tas li ntawd xwb, txoj kev rov tshab thiab qhia ntxiv txog Txoj Moo Zoo, ua rau kev pe hawm hauv lub tuam tsev pab yus rov qab nco tau txhua yam ntawm txoj moo zoo.

“Kuj muaj lwm yam uas ua tim khawv txog qhov tseeb ntawm lub tuam tsev txoj hauj lwm. Lub vaj txiaj ntsim thiab lub tuam tsev txoj hauj lwm uas tus Tswv tau qhia rau tus Yaj Saub Yauxej Xamiv...yeej qhia txog plaub qho: Tej kab ke npaj; txoj kev qhia ntawm kev qhuab qhia thiab ua yam ntxwv; kev khi lus, thiab qhov kawg, kev xeeb yus txoj kev paub. Kuv xav tias tus Yaj Saub Yauxej, uas tsis txawj tsis ntse thiab tsis tau kawm dab tsi, yeej tsim tsis tau ib yam uas zoo tas npaum li ntawd.” (John A. Widstoe, “Temple Worship,” *The Utah Genealogical and Historical Magazine* 12 [Plaub Hlis Ntuj 1921]: 58.)

Hais Txwj Laug Widstoe cov lus dua tias:

“Peb nyob hauv ib lub ntiaj teb uas muaj ntau lub cim. Peb tsis paub dab tsi, tsuas yog los ntawm tej cim no xwb. Peb sau ob peb lub cim hauv ib daim ntawv, thiab hais tias cov ntawd ua ib lo lus, uas txhais tias kev hlub, los yog kev ntxub, los yog kev siab hlub, los yog Vajtswv los yog lub neej nyob mus ib txhis. Tej zaum tej lub cim no tsis zoo saib li. Tsis muaj leej twg nrhiav kev txhaum rau cov cim ntawm tej phab hauv ib phau ntawv vim tej no tsis zoo nkauj npaum tej yam lawv sawv tam. Peb tsis sib cav sib ceg vim lub cim V-a-j-t-s-w-v tsis zoo nkauj li, tiam sis nov yeej sawv tam Vajtswv lub hwj chim. Peb zoo siab vim peb muaj cov



Lub Dab Rau Kev Cai Raus Dej, Washington D. C. Iub Tuam Tsev

cim no, tsuas yog peb to taub tias cov cim txhais li cas. Kuv hais rau nej hmo no; nej tsis tau sib cav txog kuv txoj kev hais lus no, los sis tej lus kuv tau xaiv; thaum nej sim mloog kuv tej kev xav kom nej thiaj to taub, nej twb tsis nco qab xav txog tej lus thiab tej kuv xaiv hais li cas....

“Peb nyob hauv ib lub ntiaj teb uas muaj ntau lub cim. Tsis muaj ib tug txiv neej los sis poj niam uas tawm tau ntawm lub tuam tsev los thaum txais vaj txiaj ntsim lawm, tsuas yog nws tau pom, ntau tshaj lub cim, uas qhia tias lub cim ntawd sawv cev rau dab tsi. (“Temple Worship,” phab 62.)

Yog tias koj mus rau hauv lub tuam tsev thiab nco tias kev qhia yeej los ntawm tej cim los ces koj yuav tsis mus hauv ho tawm los tsuas yog koj sab ntsuj plig tau ua yog toog pom ib yam tshiab, thiab xav tias koj tau txais kev tsa nto me ntsis, rau qhov koj txoj kev to taub sab ntsuj plig tau loj hlob tuaj lawm. Txoj kev qhuab qhia yeej zoo kawg nkaus. Nws los ntawm kev tshwm sim los. Tus Tswv kiag, tus Xib Hwb Zoo, Nws txoj kev qhia rau Nws cov thwj tim twb yog kev hais paj lug, uas yog txoj kev hais tej lus ua sawv tam lwm yam uas tej zaum yuav nyuaj to taub. Nws tham txog tej yam ntawm Nws cov thwj tim lub neej, thiab Nws tau qhia txog cov poj qaib thiab qaib, cov noog, paj, hma, ntoo, neeg tub sab, neeg laib, kev hnub poob, cov nplua nuj thiab cov pluag, tus kws tshuaj, kev xaws ris tsho, do nroj, cheb tsev, pub npua, ntaus nplej, kev muab khaws cia hauv txhab, ua tsev, ntiav neeg pab, thiab ntau yam ntxiv. Nws tham txog lub me nyuam noob, lub hlaws muaj nqis. Nws xav qhia cov hnov Nws hais, ces Nws hais txog tej yam yooj yim siv tej lub cim qhia. Yeej tsis muaj ib yam no uas txawv heev, thiab tej no txhua nrho muaj cim qhia.

Lub tuam tsev kiag cia li ua ib lub cim. Yog tias koj tau pom ib lub tuam tsev thaum tsaus ntuj, ci ntsa iab, ces koj yeej paub qhov ntawd zoo saib npaum li cas. Tus Tswv lub tsev, ci ntsa iab, tshaj qhov kev tsaus ntuj, los ua lub cim qhia txog lub hwj chim thiab kev tshwm sim ntawm Yexus Khetos txoj moo zoo, nws sawv ua ib lub teeb hauv ib lub ntiaj teb uas tab tom tog mus hauv kev tsaus ntuj ntawm sab ntsuj plig.

Thawj zaug mus hauv yus yeej yuav tsis to taub lub tuam tsev tej kab li kev cai. Yuav to taub ib feem xwb. Cia li rov qab mus ntxiv thiab ntxiv thiab ntxiv. Rov qab mus kawm. Tej yam uas txob koj lub siab los sis tej yam uas ua rau koj xav tsis

thoob los sis tej yam uas koj tsis tau paub dua koj mam li to taub. Ntau yam no yuav yog tej yam nyob ntsiag to, tej yam rau koj tus kheej xwb uas koj yeej piav tsis tau rau leej twg. Tiam sis rau koj yog tej yam uas koj paub.

Tej yam uas peb tau ntawm lub tuam tsev yeej nyob ntawm peb coj dab tsi mus rau hauv lub tuam tsev zoo li txoj kev txo hwj chim thiab muaj kev tswm seeb thiab lub siab xav kawm. Yog tias peb muaj lub siab xav kawm tus Ntsuj Plig yuav qhia peb hauv lub tuam tsev.

Thaum koj muaj cib fim mus rau ib tuas txais lub vaj txiaj ntsim hauv lub tuam tsev los sis ua tim khawv rau kev sib khi, cia li ntsuam xav txog tej lub ntsiab tob tob rau tej yam koj tab tom saib. Thiab ob peb hnuv tom qab koj mus cia li xav txog tej no; cia li ntsiag to tshab thiab thov Vajtswv txog tej no thiab koj yuav pom koj txoj kev paub loj hlob.

Ib qho txiaj ntsim ntawm txoj hauj lwm hauv lub tuam tsev yog qhov uas nws qhia ntau, thiab txhij txhua txog Vajtswv tej lub ntsiab rau lub ntiaj teb. Thaum peb twb mus hauv lub tuam tsev lawm (thiab peb rov los tau thiab rov cim tau) tej xwm hauv yus lub neej ces yus pom txhua nrho. Peb pom tau peb nyob qhov twg, thiab peb pom tau sai heev thaum peb taug txoj kev tsis yog lawm.

Ces cia li ntsia lub tuam tsev. Coj qhia koj tej me tub me nyuam txog lub tuam tsev. Txij thaum lawv yog mos liab, qhia lawv txog nws, thiab pib npaj lawv rau hnuv uas lawv nkag tau hauv lub tuam tsev dawb huv.

Thaum ua li no, koj cia li muaj lub siab xav kawm, ua neeg tswm seeb. Cia li rau siab kawm tej kev qhia—tej lub cim, tej kev qhia tob tob ntawm sab ntsuj plig—yus tsuas kawm tau hauv lub tuam tsev.

Yuav tsum siv sij hawm npaj rau kev sib yuav hauv lub tuam tsev. Tsim nyog yus ua tib zoo npaj. Feem ntau tej khub tub ntxhais hluas uas sib nyiam txiav txim siab tias nkawd xav sib yuav, thiab txawm niam txiv hais li cas los, nkawd xav sib yuav tam sim ntawd, tos li ib los ob lis piam xwb. Qhov uas niam txiv taij kom muaj sij hawm npaj ntxiv tej thaum ua rau khub hluas xav tias qhov no qhia tias niam txiv tsis pom zoo rau kev sib yuav. Nkawd ntshai yog tias nkawd tos ces yuav muaj dab tsi tab kaum nkawd. Tej khub hluas qhia tias nkawd tseem hluas xwb thiab ua siab tsis zoo thaum nkawd yuam kom ua

ub no uas nyuaj heev thiab feem ntau ua rau lub sij hawm ntawd tsis zoo siab npaum yog tias tau muaj sij hawm me ntsis.

Yog tias maj ua los sis muaj kev nyuaj siab ntau, zoo nkaus li tau xiam ib qho dab tsi los ntawm thawj zaug uas tau mus xyuas lub tuam tsev, los sis ntawm hnuv sib yuav hauv lub tuam tsev. Thawj zaug uas mus hauv lub tuam tsev no los sis txoj kev sib khi thaum hnuv sib yuav twb yuav yog tib lub cib fim zoo li no hauv yus lub neej. Tsim nyog yus npaj rau qhov ntawd. Nws tseem ceeb heev ces peb yuav tsum tsis txhob cia tej kev npaj me me tab kaum peb. Yog li ntawd, yuav tsum ua txhua yam ua ntej. Yuav muaj kev nyuaj siab yog tias tsis tau npaj ib yam dab tsi tseem ceeb tos txog hnuv ntawd tso.

Yog tias koj mus rau ib qho kev sib ntsib ntxov me ntsis thiab zaum hauv chav sib ntsib nyob ntsiag to thiab saib cov neeg tuaj txog, koj pom tias lawv nqa ib yam dab tsi nrog lawv. Tus ntsuj plig puv chav ntawd thiab chav ntawd pauv los ntawm ib chav khoob khoob mus rau ib pawg neeg, muaj cov kwv tij thiab muam uas tau tuaj xav kawm ib yam dab tsi tshiab.

Niaj hnuv no, peb muaj hauj lwm ntau heev ces peb ua tsis tau qhov no txhua lub caij peb muaj txoj kev sib ntsib. Tiam sis qhov uas peb npaj txais ib yam tshiab li no haj yam tseem ceeb thaum peb mus rau lub tuam tsev. Thiab qhov no los haj yam tseem ceeb rau thawj zaug peb mus. Peb yuav tsum mus txog ntxov.

Yam li koj pom, txoj kev mus ntxov no tsis yog rau kev tiv thaiv xwb, tsis yog kom muaj daim ntawv tso cai thiab npaj txhua yam tsav xwv kom peb npaj tau rau lub cib fim tshiab no xwb. Nws ntau tshaj qhov ntawd. Nws yog kom mus txog qhov chaw yog kom muaj sij hawm txaus txais tau tus ntsuj plig zoo nrog peb—kom npaj peb tus kheej txais tej yam uas yuav los.

Peb tau sib tham txog cov neeg uas tab tom ua hauj lwm hauv lub tuam tsev, tiam sis muaj qee zaus thaum npaj rau kev sib yuav hauv lub tuam tsev thiab ib co neeg ntawm tsev neeg tsis tsim nyog txais daim ntawv tso cai nkaq hauv tuam tsev. Tej zaum yog vim tus txiv neej los sis tus poj niam yog neeg ntseeg tshiab thiab nws niam thiab txiv tseem tsis tau los zwm rau lub Koom Txoos; los yog nkawd tseem tshiab tshiab rau lub Koom Txoos ces yuav tsis tau daim ntawv tso cai nkaq hauv tuam tsev. Los sis yog tias niam txiv yog mej zeej hauv

lub Koom Txoos tiam sis lawv ib leeg tsis koj nws lub neej raws li txoj moo zoo tej ntsiab cai txaus kom tau daim ntawv tso cai nkag hauv tuam tsev. Tej no ua teeb meem loj loj thaum muaj kev sib yuav hauv lub tuam tsev. Nov yog tej lub sij hawm uas tsev neeg yuav tsum nyob sib ze, lawv yuav tsum sib rub tes los koom ua ke khaws tej lub sij hawm dawb ceev hauv lub neej no. Qhov tsis pub ib daim ntawv tso cai nkag hauv tuam tsev rau ib tug neeg uas tsis tsim nyog txais, los sis qhov uas caw tsis tau ib tug phooj ywg los sis ib tug kwv tij uas tsis yog mej zeej rau kev sib khi, yuav kawj teeb meem loj. Nov yuav ua kom muaj kev tsis zoo siab thiab kev sib cav sib ceg txawm tias twb yog lub sij hawm uas xav tau kev thaj yeeb nyab xeeb, thiab kev sib haum xeeb.

Peb yuav tsum ua dab tsi thaum muaj xwm li no? Qhov peb tau ua yog tsis txhob ua nyuaj nyuaj rau tus npis sov. Tus npis sov, ua raws li kev cai hais kom nws tau ceev vim nws yog ib tug txiav txim hauv Ixayees, ua tsis tau siab ncaj ncees thiab muab ib daim ntawv tso cai rau ib tug neeg uas tsis tsim nyog txais. Yog tias muab rau ces qhov ntawd yuav ua dab tsi tsis zoo rau tus neeg ntawd. Thiab yuav tsis ncaj rau tus npis sov kiag.

Thaum muaj kev sib yuav hauv lub tuam tsev thiab niam los sis txiv los sis ib tug txheeb ze nkag mus tsis tau hauv lub tuam tsev, txoj kev ua tib zoo npaj no yuav ua ib lub cib fim zoo thiaj tsis kawj teeb meem. Cia li xav txog tej no. Caw niam los sis txiv uas tsis yog mej zeej, los sis tus mej zeej uas tsis tsim nyog txais daim ntawv tso cai nkag hauv tuam tsev, kom lawv tuaj rau lub tuam tsev nrog cov uas tuaj koom txoj kab ke sib yuav. Nyob ntawm tshav tuam tsev muaj ib tug ntsuj plig thiab kev chob siab uas yus nrhiav tsis tau hauv lwm qhov chaw. Ib txhia tuam tsev muaj tej tsev rau neeg xyuas. Txhua tshav tuam tsev yeej tu tau zoo nkauj. Nws yog ib qho chaw muaj kev thaj yeeb nyab xeeb thiab kev nyob kaj siab lug.

Npaj kom ib tug neeg nyob nrog tus neeg ntawm nej tsev neeg ntawd. Tsis txhob tso tus neeg ntawd nyob nws ib leeg. Muaj tej lub sij hawm uas cov neeg ntawm nej tsev neeg uas tsim nyog mus hauv lub tuam tsev ua tim khawv rau kev sib yuav yeej zoo siab nyob ntawm tshav tuam tsev nrog nraim cov uas nkag tsis tau hauv. Nyob ib ncig lub tuam tsev li no lawv muaj caij piav txog khub niam txiv hluas txoj kev xav sib yuav hauv tus Tswv lub tsev.



Chav Ntuj Tsim Teb Raug, Salt Lake lub Tuam Tseu

Lub sij hawm no yuav muaj caij qhia rau lawv tej yam uas tej zaum lawv yuav tsis tau kawm. Piv xam hais tias, hauv cov tuam tsev loj muaj cov neeg coj yus mus ncig tshav tuam tsev. Kev npaj ntxov yuav pab tus neeg uas nkag tsis tau hauv lub tuam tsev kom lawv to taub zoo dua. Niam txiv uas tsis yog mej zeej los sis niam txiv uas nkag tsis tau hauv lub tuam tsev txoj kev poob siab thiab kev chim siab, ho tej thaum kev npau taws yuav ntaug me ntsis yog tias ua tej yam zoo li piav saum no.

Nyob hauv tej lub tuam tsev muaj tej chav tsev tshwj xeeb rau niam thiab txiv uas tsis tsim nyog mus hauv lub tuam tsev kiag mus tau thiaj ntsib ib tug neeg uas muaj cai teb lawv cov lus nug.

Khub niam txiv hluas yuav tsum nco qab ntsoov tias nkawd niam txiv tau npaj rau nkawd hnuv sib yuav txij hnuv yug nkawd los. Lawv txoj kev xav pom kev sib yuav, thiab lawv txoj kev chim siab thaum lawv pom tsis tau, qhia tias lawv yog niam txiv uas hlub lawv cov me nyuam heev. Ces khub niam txiv hluas yuav tsum tsis txhob chim thiab. Yuav tsum to taub thiab ua tib zoo npaj qhov no ua ib qho ntawm kev sib yuav.

Muaj tej lub sij hawm thaum tus niam los sis txiv uas tsis tsim nyog mus hauv yuav tu siab thiab yeej nplij tsis tau nws siab. Thaum muaj tej lub sij hawm zoo li no, khub niam txiv hluas yuav tsum ua siab ntev nyiaj qhov ntawd. Ces yuav muaj lo lus nug hais tias: Ces yog li ntawd wb puas yuav tau sib yuav raws li tseem fwm kev cai xwv kom lawv pom tau kev sib yuav, ces yuav tau tos ib xyoo mam li nkag tau hauv lub tuam tsev? Tiam sis qhov no tsis yog qhov zoo tshaj plaws. Txoj kev thov Vajtswv thiab kev npaj zoo yuav kho tau qhov teeb meem ua ib lub cib fim uas thaum kawg yuav coj tsev neeg ntawd los nyob sib ze dua yav tas los lawm.

Tsis txhob caw phooj ywg coob coob, cov mej zeej ntawm yus pawg ntseeg, thiab lwm cov neeg coob tuaj saib kev sib yuav. Pawg tuaj saib kev sib yuav yuav tsum ua tej pawg me me, tsuas muaj tej tus neeg ntawm ob tsev neeg uas nyob ze ze khub niam txiv hluas. Tej thaum tau tshaj tawm hauv pawg ntseeg txog kev sib yuav thiab tau caw txhua tus uas tuaj tau yuav los txhawb pab thiab txhawb nqa khub niam txiv uas sib yuav ntawd. Nov twb yog lub ntsiab ntawm lub rooj tshoob. Lub rooj tshoob yog kom muaj caij tos txais cov phooj ywg thiab cov uas xav qhia lawv kev zoo siab rau khub niam txiv.

Txoj kev sib yuav hauv lub tuam tsev yuav tsum yog ib qho dawb ceev thiab yuav tsum faib rau cov neeg tseem ceeb ntawm khub niam txiv lub neej.


Peb tsis txhob hais cov lus ntawm txoj kab ke sib khi sab nraum lub tuam tsev, tiam sis peb piav tau tias chav sib khi zoo nkauj kawg, muaj kev thaj yeeb thiab tus ntsuj plig zoo siab, thiab chav ntawd tau kev dawb huv los ntawm tej hauj lwm dawb ceev ua hauv.

Ua ntej khub niam txiv los rau ntawm lub thaj yuav txais txoj kab ke sib khi tus neeg coj kev muaj caij qhia, thiab khub niam txiv muaj caij txais kev qhuab ntuas. Tej yam nram no yog tej uas cov niam txiv hluas no yuav hnov thaum lub sij hawm no.

“Hnub no yog neb hnub sib yuav. Neb tab tom xav ntau txog neb txoj kev sib yuav. Twb tau ua cov tuam tsev ua chaw dawb huv rau tej kab ke zoo li no. Peb tsis nyob hauv lub ntiaj teb. Tej yam uas nyob ntawm lub ntiaj teb tsis muaj kab muaj kev hauv no thiab yuav tsis ua li cas rau tej yam peb ua hauv no. Peb tau tawm ntawm lub ntiaj teb los nyob hauv tus Tswv lub tuam tsev. Hnub no cia li peem los ua hnub tseem ceeb tshaj plaws hauv nej lub neej.

“Neb tau yug los, neb niam txiv tau caw neb tus ntsuj plig los nyob hauv neb cev nqaij daim tawv. Neb ob leeg tau ua kev cai raus dej. Kev cai raus dej, yog ib txoj kab ke dawb ceev, ua ib lub cim txog kev ntxuav, ua ib lub cim txog kev tuag thiab kev sawv rov los, ua ib lub cim txog kev sawv los nyob hauv ib lub neej tshiab. Nws kuj suav kev hloov siab lees txim thiab kev zam txim tib si. Lub cim nco txog yog txoj kev rov qab khi lus ib yam thaum ua kev cai raus dej, thiab yog tias peb rau siab ntso peb txais tau kev zam txim rau peb tej kev txhaum

“Koj, tus vauv, tau txais lub pov thawj hwj. Koj xub tau txais lub Pov Thawj Hwj Aloos thiab tau loj hlob txais tej hauj lwm no—tus dis kas, tus xib hwb, thiab tus pov thawj. Ces tau muaj hnub uas koj tsim nyog txais lub Pov Thawj Hwj Mekixedes. Lub pov thawj hwj no, yog lub pov thawj hwj siab dua, yog lub pov thawj hwj ua raws Vajtswv tus txheej txheem dawb huv tshaj plaws, los sis lub Pov Thawj Hwj Dawb Huv uas raws Vajtswv tus Tub tus Txheej Txheem. (Saib Amas 13:18 thiab Hilamas 8:18.) Koj tau txais ib txoj hauj lwm hauv lub pov thawj hwj. Tsam no koj yog ib tug txwj laug.



Daim Duab los ntawm Chav Rau Lub Vaj, Los Angeles California lub Tuam Tsev

“Neb ob leeg tau txais neb lub vaj txiaj ntsim. Nyob hauv vaj txiaj ntsim ntawd neb tau txais dab tsi uas kav tau ib txhis. Tiam sis txhua yam no, kuj yog tej yam xub thawj thiab tej kev npaj neb los rau ntawm lub thaj yuav tau kev sib khi ua niam txiv rau lub neej no thiab lub neej nyob mus ib txhis. Nim no neb peem los ua ib yig lawm, muaj cai tsim tub tsim ki, muaj lub cib fim dhau ntawm kev rau siab thiab kev txi yuav coj tau me tub me nyuam los rau hauv lub ntiaj teb thiab yuav tu lawv thiab qhia lawv kom lawv mus dhau lub neej hauv lub ntiaj teb no; kom muaj ib hnuv pom lawv los, ib yam li neb tau los, ua tej kab ke dawb ceev hauv lub tuam tsev.

“Neb zoo siab tuaj no thiab tau raug kev txiaj txim tias neb tsim nyog. Txoj kev sib yuav no yuav tau kev sib khi los ntawm tus Ntsuj Plig Dawb Huv ntawm Kev Cog Lus.”

Tus Tswv hais tias nws yuav muab dua ib tug Nplij Siab rau peb, nws cov phooj ywg, xwv kom nws nyob hauv peb tej siab. Tus Nplij Siab yog tus Ntsuj Plig Dawb Huv ntawm kev cog lus; lwm tus Nplij Siab no yog tib tug uas Nws tau cog lus tias yuav nrog Nws cov thwj tim nyob, li uas tau muab sau cia hauv Yakhauj cov lus tim khawv.

Tus Nplij Siab no yog lo lus cog tseg uas tus Tswv muab rau peb txog txoj sia nyob mus ib txhis, twb yog lub yeeb koob ntawm lub nceeg vaj xilethi-aus. (saib Q&K 88:3–4.)

“Txoj kev txais yuav lwm tus neeg ntawm kev sib yuav sib khi lus yog ib txoj hauj lwm tseem ceeb heev, qhov no muaj koob hmoov ntau nplua mias.”

Tej zaum tus poj niam thiab tus txiv neej yuav zoo siab dhau ces nkawd tsis nco qab ua tib zoo mloog—tej zaum nkawd tsis mloog cov lus ntawm txoj kab ke sib khi. Txawm tias peb tsis rov hais cov lus ntawd sab nraum lub tuam tsev, peb rov qab tuaj tau, ua tim khawv rau ib txoj kev sib yuav. Twb yog ib tug Tswv muaj siab dawb siab zoo uas tau muab cai rau peb ua li no. Thaum muaj caij ua li no, thaum peb tsis ua txoj kab ke kiag, ces peb ua tib zoo mloog tau cov lus ntawm txoj kab ke no. Tsis tas li ntawd xwb, yog peb rov mus ntau zaus coj ua kab ke rau cov uas tau tuag lawm, peb rov qhia peb lub siab thiab tus ntsuj plig thaum ua txoj hauj lwm ntawm lub vaj txiaj ntsim.

Yog tias koj twb sib yuav ntawm tseem fwv txoj kab ke cai lawm, tej zaum tam sim no koj yuav xav ua kev cai sib khi rau

tas mus ib txhis, thiab, yog tias koj muaj me tub me nyuam, muaj lawv khi rau koj hauv ib yim neeg uas nyob ua ke tas mus ib txhis. Yog tias koj tsim nyog txais qhov no tej zaum koj yuav tau lub cib fim txais txoj koob hmoov no.

HNAV IB CE DAWB

Thaum peb ua tej kab ke hauv lub tuam tsev peb hnav khaub ncaws dawb. Cov khaub ncaws no ua ib lub cim txog kev huv huv thiab kev tsim nyog thiab kev dawb huv.

Thaum nkag mus hauv lub tuam tsev koj pauv koj cev ris tsho rau lub tuam tsev ib ce khaub ncaws dawb. Txoj kev pauv ris tsho no nyob hauv hoob pauv khaub ncaws, nyob hauv no txhua tus muaj ib lub tub tso khaub ncaws thiab muaj chaw pauv ris tsho thiab tsis muaj neeg pom yus. Nyob hauv lub tuam tsev sawv daws ua tib zoo coj txoj kev dawb huv. Thaum koj tso koj ris tso hauv lub tub koj kuj tso koj tej kev nyuaj siab thiab kev txhawj xeeb thiab kev kub ntxhov tseg cia thiab. Thaum koj tawm ntawm chaw pauv khaub ncaws no ho hnav ib ce dawb dawb thiab koj hnov kev sib koom siab thiab kev sib txig, vim txhua leej txhia tus puav leej hnav tib yam nkaus.

Yog tias koj tab tom mus rau lub tuam tsev thawj zaug, cia li sab laj nrog koj tus npis sov. Thaum nws muab daim ntawv tso cai nws yuav piav me ntsis txog tej khaub ncaws yuav tau hnav hauv lub tuam tsev. Koj tsis tas txhawj txog kev yuav cov khaub ncaws no. Koj yuav tau cov no los ntawm lub Koom Txoos Lub Tsev Pab Xa Khoom los sis, tej thaum, xaub ib ce tom lub tuam tsev. Txoj kev xaub ib ce yeej pheej yig uas yuav them tus nqis ntxhua ris tsho. Tsis muaj kev xaub khaub ncaws hauv cov tuam tsev me me.

Zoo nkaus li tej kab li kev cai thiab kab ke hauv lub tuam tsev, sab nraum lub tuam tsev peb tsis tshuav tham txog cov khaub ncaws peb hnav sab hauv. Peb hais tau tias, ib yam li tej kab li kev cai, muaj ntau lub cim qhia.

Nws yog ib lub cim txog kev tswm seeb thiab kev hwm thaum ib tug mej zeej ntawm lub Koom Txoos los xyuas lub tuam tsev thiab hnav thiab tau tu cev zoo txaus sawv ntawm tus Tswv xub ntiag ho tsis txaj muag li. Cia li xav seb yog tias luag tau caw koj mus xyuas ib tug nom tswv uas muaj suab muaj npe. Luag qhia koj tias koj yuav mus nrog lwm cov neeg

uas tau kev caw ib yam li koj sib tham ua ke. Txoj kev caw no qhia tias tus nom saib koj rau nqi. Koj yeej paub tias luag tej yuav zoo siab yog tias lawv tau txo kev caw no, tiam sis yeej muaj dab tsi lawv thiaj li tsis tau kev caw no ces yog li ntawd lawv tuaj koom tsis tau. Yog muaj xwm li no yeej xav tias koj yuav tsis tuaj koom lawv tsuas yog hnav cev khaub ncaws ua zog los sis hnav zoo li thaum koj mus ua si. Yeej xav tias yuav tsis muaj ib tug txiv neej mus ho tsis tau chais hwj txwv, los sis ib tug poj niam uas tsis tau ntsis plaub hau li.

Cov neeg txawj xav thiab paub kev cai, thaum txais kev caw rau ib qho sab laj tseem ceeb lawm, lawv yeej yuav noog seb yuav tsum hnav li cas thiaj phim sawv daws. Koj puas yuav ua tib zoo npaj rau ib qho tseem ceeb li no? Nyaj koj yuav yuav ib ce khaub ncaws tshiab vim koj vam tias koj yuav tsis hnav dab tuag.

Thiab kuj yuav tau ntxhua thiab ua tib zoo liv koj khaub ncaws. Koj yuav nyob tsis tau yog koj tsis hnav phim luag tej.

Nyaj txoj kev caw no yuav muab piv tau rau txoj kev mus rau lub tuam tsev.

Tsuas muaj tib lub sij hawm thaum cov mej zeej ntawm lub Koom Txoos yuav hnav khaub ncaws dog dig thaum mus rau lub tuam tsev xwb, lub sij hawm no yog thaum lawv tuaj ua tim khawv rau txoj kev sib yuav hauv lub tuam tsev. Thaum muaj li no yus tsuas hle khau, thiab tej zaum yuav rau nkawm khau dawb. Ntau xyoo dhau los cov Txwj Laug pom zoo rau qhov no vim ib txhia ntawm yus tsev neeg thiab phooj ywg tsis tuaj koom tuas ua vaj txiaj ntsim ua ntej txoj kev sib yuav.

Cov nkauj nyab thiab nraug vauv mus hauv lub tuam tsev kom thiaj tau sib yuav rau lub sij hawm no thiab tas mus ib txhis. Nyob ntawd cov nkauj nyab hnav ib daim tiab dawb uas muaj tes tsho ntev, uas yog ntaub zoo uas npog lawv lub cev zoo zoo, thiab cov no tsis muaj khoom hlaws ntau ntau. Cov nraug vauv kuj hnav ib ce khaub ncaws dawb thiab. Cov kwv tij uas tuaj ua tim khawv rau kev sib yuav hauv lub tuam tsev tsis hnav tej cev xuv tuxedo.

Peb xav tsis thoob thiab ib nyuag tu siab thaum mus rau lub tuam tsev, ho pom ib txhia ua tuaj ua tim khawv rau kev sib yuav los sis tuaj koom ib tuas hauv lub tuam tsev lawv hnav khaub ncaws zoo nkaus li lawv mus noj mov los sis mus xyuas ib qho ncaws pob.

Peb yuav tau saib txoj kev mus rau lub tuam tsev rau nqi me ntsis. Tus Tswv zoo siab heev thaum peb da dej thiab hnav khaub ncaws huv huv, txawm tias cov khaub ncaws tsis kim los xij. Peb yuav tau hnav zoo li thaum peb mus rau lub rooj sab laj noj lub cim nco txog los sis mus rau ib qho kev sab laj uas tseem ceeb thiab muaj kab muaj ke.

Tej thaum muaj ib tug uas tuaj ua tim khawv rau kev sib yuav uas yeej tsis tau quav ntsej cov Txwj Laug kev ntuas txog kev tu cev thiab hnav khaub ncaws, kom tsis txhob ua raws li lub ntiaj teb ua ho hnav tsuj hnav npuag, muaj plaub hau ntev dhau thiab kho txawv txawv, thiab ntxiv. Peb xav paub yog vim li cas ib tug neeg uas coj cwj pwm laus kom thiaj nkag tau mus hauv lub tuam tsev, nws tsis paub tias tus Tswv tsis pom zoo rau ib tug neeg uas nyiam raws lub ntiaj teb tej kev.

Ua li cas ib tug mej zeej uas tuav ib daim ntawv tso cai nkag hauv tuam tsev yuav hnav tej yam tsis dawb huv los sis tej yam ntawm lub ntiaj teb li no? Yog vim li cas ib tug neeg thiaj yuav kho plaub hau xwv kom tsis coj raws li kev cai zoo thiab kev hwm?

Thaum koj muaj caij mus rau lub tuam tsev thiab ua tej kab li kev cai hauv lub tuam tsev los sis mus ua tim khawv rau kev sib khi, nco ntsoov hais tias koj nyob qhov twg. Koj yog ib tug neeg qhua hauv tus Tswv lub tsev. Koj yuav tau tu koj tus kheej thiab hnav khaub ncaws zoo kom koj thiaj li tsis txaj muag yog tias tus Tswv Tsev tshwm los.

Cov uas tuav thiab tau cov koob hmoov ntawm lub pov thawj hwj yuav tsum npog lawv lub cev ib yam li tus Yaj Saub Yauxej Xamiv qhia thaum nws txais kab li kev cai ntawm lub vaj txiaj ntsim.

Cov mej zeej uas tau txais lawv tej kab ke hauv lub tuam tsev lawm yuav hnav ib ce tsoos tsho los sis ris tsho sab hauv tseem ceeb heev. Yus tau cev tsoos tsho no los ntawm lub Koom Txoos ib lub tsev lag luam—thiab feem ntau cov mej zeej thoob ntiaj teb yuav tau cov no los ntawm lub Koom Txoos kev faib tawm.

Cev tsoos tsho ua piv txwv txog tej kev khi lus dawb ceev. Nws yaum kom yus hnav zoo thiab cia li los tiv thaiv thiab pov hwm tus neeg uas hnav.

Kev hnav cev tsoos tsho kuj tsis txwv tus mej zeej ntawm kev hnav zoo li lwm tus neeg ntawm tej teb chaws hauv lub



Church of the Latter-day Saints, Salt Lake City, Utah

ntiaj teb. Tsuas yog hnav tsis zoo los sis tsis dawb huv thiaj yuav tsis haum kev hnav cev tsoos tsho. Ib tug mej zeej ntawm lub Koom Txoos twg, txawm nws twb mus hauv lub tuam tsev los tseem tsis tau, uas coj tus ntsuj plig yuav tsis xav hnav khaub ncaws tsis dawb tsis huv.

Muaj qee zaus thaum cov mej zeej ntawm lub Koom Txoos raug lus nug txog cev tsoos tsho.

Muaj ib zaug thaum ib tug txwj laug raug caw mus hais lus rau cov neeg uas ua hauj lwm rau lub Tsev Kawm Ntawv Rau Cov Xib Hwb Ntawm Pab Tub Rog Hiav Txwv uas nyob tim Newport, Rhode Island. Nyob hauv pawg neeg ntawd tau muaj cov xib hwb uas nyob qib siab hauv pab tub rog hiav txwv kuj muaj cov xib hwb Txiv Plig, Protestant, thiab neeg Yudais.

Thaum lub cajj nug thiab teb ib tug xib hwb nug hais tias, "Koj piav me ntsis puas tau ntsig txog cov ris tsho sab hauv tseem ceeb uas ib txhia tub rog Maumoos hnav?" Tiag tiag nws xav nug tias, "Ua li cas nej thiaj hnav li ntawd? Qhov ntawd txawv heev puas yog? Nws puas yuav kawj teeb meem li cas?"

Tus txwj laug teb tus xib hwb ntawd thaum nws nug hais tias: "Koj sawv cev rau lub tshawj twg?" Nws teb hais tias nws sawv cev rau ib lub tshawj Protestant.

Txwj Laug hais tias, "Nyob hauv koj lub neej thiab thaum koj coj tej kev sab laj thaum ua tub rog koj yeej hnav ib ce khaub ncaws ua Vajtswv hauj lwm puas yog?" Tus xib hwb teb tias nws yeej hnav.

Nws hais ntxiv tias: "Kuv xav tias qhov ntawd tseem ceeb rau koj, thiab zoo li qhov ntawd qhia tias koj ib nyuag txawv lwm cov neeg ntawm koj pawg ntseeg. Nws yog koj cev khaub ncaws ua hauj lwm ua ib tug xib hwb. Thiab kuv kuj xav tias nws tseem ceeb dua qhov ntawd thiab. Nws ua rau koj nco tias koj yog leej twg thiab koj muaj ntiag tug hauj lwm li cas thiab koj tau sib khi lus li cas. Nws pheej ua rau koj nco tias koj yog ib tug xib hwb, thiab ua rau koj xav tias koj yog tus Tswv ib tug tub qhe, thiab tias koj yuav tsum coj koj lub neej zoo xwv kom koj tsim nyog ua koj tej dej tej num."

Ces nws hais rau lawv tias: "Nej yuav tsum to taub ib lub ntsiab yog vim li cas Haiv Neeg Ntseeg hauv Hnub Nyoog Kawg muaj kev xav tob tob ntawm sab ntsuj plig rau cev tsoos tsho. Ib qho txawv heev ntawm nej tej tshawj thiab peb lub yog tias peb tsis muaj neeg ua xib hwb txais nyiaj li nej lub. Tej pawg

ntseeg muaj cov thawj coj hauv nroog los xwb. Lawv yog tej txiv neej uas nyias ua nyias txoj hauj lwm. Tab sis lawv tau raug tsa rau lub pov thawj hwj. Lawv muaj tej hauj lwm ua hauv lub pov thawj hwj. Lawv raug tsa ua cov kav xws li tus thawj tswj hwm, cov pab cuam, thiab lwm cov thawj coj. Thiab cov poj niam kuj muaj tej ntiag tug hauj lwm thiab muaj kev lav thiab. Tus txiv neej uas coj peb pawg ntseeg thaum hnuv Sunday ua tus npis sov tej zaum hnuv Monday nws yuav mus hauj lwm ua tus kws xa ntawv, kws lag luam, kws ua teb, kws tshuaj, los sis nws yog neeg tsav dav hlau los sis ib tug nom ntawm pab tub rog hiav txwv. Nyob ntawm peb kab li kev cai nws yog ib tug xib hwb ib yam li ntawm nej kab li kev cai. Cov tseem fwv feem ntau pom zoo rau lawv ua thiab. Peb tau ib yam koob hmoov ntawm cev khaub ncaws tseem ceeb no ib yam nej tau ntawm nej cev khaub ncaws ua Vajtswv hauj lwm. Qhov txawv yog qhov uas peb hnav peb li sab hauv peb cev ris tsho tsis yog sab nraud, rau qhov peb ua hauj lwm khwv nyiaj txiag ces txuas ntxiv peb tej hauj lwm ntawm lub Koom Txoos rau. Tej yam dawb ceev no peb tsis xav qhia rau lub ntiag teb pom.”

Ces nws piav tias muaj tej lub ntsiab tob me ntsis rau ntawm sab ntsuj plig, uas txuas txoj kev hnav cev tsoos tsho no rau tej kev khi lus uas tau khi hauv lub tuam tsev. Peb tsis tas sib tham txog tej no—tsis yog vim tias peb xav muab tej no zais cia, nws hais dua, tiam sis vim lawv dawb ceev heev.

Cev tsoos tsho, uas npog lub cev, yog ib yam yus pom thiab muaj tiag uas pab yus nco txog tej kev khi lus no. Rau ntau tus mej zeej hauv lub Koom Txoos cev tsoos tsho tiv thaiv tus neeg hnav ntawd thaum nws raug kev ntxias. Thiab ib qho ntxiv nws ua ib lub cim txog peb txoj kev saib taus Vajtswv tej kev cai—ib txoj no yog txoj kev cai ua neeg ncaj ncees.

LUB HWJ CHIM MUAB SIB KHI

Yog tias peb xav to taub zaj keeb kwm thiab tej lus qhuab qhia ntawm txoj hauj lwm hauv lub tuam tsev tib si peb yuav tsum to taub tias lub hwj chim muab sib khi yog dab tsi. Peb yuav tsum pom, txawm me npaum li cas, yog vim li cas cov yuam sij ntawm txoj cai kom siv lub hwj chim muab sib khi tseem ceeb kawg.



Chav Xilethi-aus, Provo Utah lub Tuam Tsev

Ze li cuaj pua xyoo ua ntej yug Yexus, tus yaj saub Eliyas tau sawv rau ntawm cov neeg Ixayees tus vaj ntxwv xub ntiag. Nws yeej muaj ib txoj cai dawb ceev: uas yog lub hwj chim muab khi ua ke.

Eliyas tau ua nws txoj hauj lwm, tau tsa thiab pleev roj rau Elixas los pauv nws chaw, thiab ces—thiab qhov no yog qhov tseem ceeb heev—nws tsis tau tso lub neej no tseg. Zoo li Mauxes ua ntej nws, nws tau raug hloov hlo tsis tau tuag li.

Tom qab ntawd, tsuas pom nws lub npe ib zaug ntxiv hauv Phau Qub, hauv nqes ua ntej nqes kawg hauv tshooj kawg hauv Phau Qub. Nyob ntawm no Malakis qhia tias Eliyas yuav rov qab los thiab tias nws yuav “nws yuav coj leej txiv thiab tej me tub me nyuam los nyob ua ke dua, thiab cov me nyuam tej siab yuav nco qab xav txog leej txiv” nyob tsam lub ntiag teb tag nrho yuav raug ib qho kev foom phem. (Saib Malakis 4:5–6).

Yexus mus pem lub xeev uas nyob ze ze lub moos Xixaleyas Filipis, thaum ntawd nws nug nws cov thwj tim hais tias, Tej neeg hais tias, Neeg Leej Tub yog leej twg?

Lawv teb hais tias, Muaj qee leej hais tias koj yog tus Yauhas uas coj neeg ua kev cai raus dej: qee leej hais tias yog Elias, qee leej hais tias yog Yelemis, los sis hais tias yog ib tug xib hwb cev Vajtswv lus.

Yexus rov nug lawv hais tias, Ua li nej ne, nej ho hais tias kuv yog leej twg?

Ximoos Petus teb hais tias, koj yog tus Khetos uas yog tus Vajtswv uas muaj sia nyob Leej Tub.

Yexus hais rau nws hais tias, Yaunas tus tub Ximoos es, koj hmoov zoo: tej lus no tsis yog neeg qhia rau koj, tiam sis yog kuv Txiv tus uas nyob saum ntuj ceeb tsheej qhia rau koj.

Thiab kuv kuj hais rau koj, Tias koj yog Petus, thiab saum lub pob zeb no kuv yuav tsa kuv lub tshawj; thiab lub qhov rooj ntawm ntuj xtiag teb tsaus yuav tsis kov yeej nws.

Kuv yuav muab tus yuam sij uas qhib rooj ntug rau koj tuav; tej yam uas koj txwv hauv ntiag teb no, Vajtswv yuav txwv saum ceeb tsheej; thiab yam uas koj pub ua hauv ntiag teb no, Vajtswv yuav pub ua saum ceeb tsheej. (Mathais 16:13–19.)

Thaum Petus, Yakaunpaus, thiab Yauhas tau nrog tus Tswv nce mus saum lub Roob ntawm Kev Hloov Hlo, tau muaj ob tug neeg uas tau tshwm sim tuaj nrog tus Tswv thaum nws lub cev tau hloov hlo. Lawv pom tias nkawd yog Mauxes thiab Eliyas, uas tau los muab lub hwj chim ntawm kev sib khi rau pawg thawj tswj hwm ntawd. (Saib Mathais 17:1–8; yuav tsum paub hais tias ntawm yam lus Kilis lo lus *Elias* thaum muab txhais ua lus Henplus hais tias *Eliyas* thiab feem ntau thaum siv hauv Phau Tshiab nws hais txog Eliyas, tus yaj saub hauv Phau Qub.)

Petus yog tus uas yuav tuav cov yuam sij. Petus yog tus uas yuav tuav lub hwj chim muab sib khi, uas yog txoj cai kom muaj hwj chim pub ua los sis hais tias muab khi hauv lub ntiaj teb los sis txwv hauv lub ntiaj teb thiab yuav muaj tib yam li ntawd saum ntuj ceeb tsheej.

Thaum xyoo A.D. 34, tom qab Nws tuag saum ntoo khaub lig, tus Tswv tau qhia cov neeg Nifais. Nws rov qab qhia lawv—thiab no yog ib yam tseem ceeb hauv phau vaj lug kub zaj keeb kwm—ob tshooj kawg ntawm Malakis (uas muaj lus tshwm sim tias Eliyas yuav rov los), nws hais kom lawv muab cov no sau cia, thiab tau qhia ntxiv txog cov no.

Thaum tus tim tswv Maulaunais tau tshwm los rau tus Yaj Saub Yauxej Xamiv pom thiab qhia nws txog cov phiaj, nws tau rov qhia Malakis tej lus tshwm sim tias Eliyas yuav rov los. Cov lus no nyob hauv tshooj ob hauv Phau Qhuab Qhia thiab Khi Lus.

Kaum peb xyoo tom qab Maulaunais tshwm los, twb tau ua ib lub tuam tsev rau lub ntsiab no, thiab tus Tswv tau rov los thiab Eliyas tau nrog Nws los thiab tau muab cov yuam sij ntawm lub hwj chim muab sib khi rau.

Cov yuam sij ntawd yog tus Thawj Tswj Hwm ntawm lub Koom Txoos li—yog tus yaj saub, tus pom tau, thiab tus neeg qhia kev tshwm sim li. Lub hwj chim muab sib khi dawb ceev ntawd tseem nyob hauv lub Koom Txoos tam sim no. Cov neeg uas paub tias txoj cai ntawd tseem ceeb npaum li cas tiag tsis muaj dua ib yam dab tsi uas lawv saib ua ib yam dawb ceev npaum qhov no. Tsis muaj ib yam uas tseem ceeb npaum. Tsuas muaj cov txiv neej tsawg heev uas tuav lub hwj chim muab sib khi hauv lub ntiaj teb no thaum tib lub sij hawm—hauv txhua lub tuam tsev yeej muaj ib cov txwj laug uas tau

txais lub hwj chim muab sib khi ua ke no. Tsis muaj leej twg uas tau lub hwj chim no tsuas yog dhau ntawm tus yaj saub, tus pom tau, thiab tus neeg qhia kev tshwm sim thiab tus Thawj Tswj Hwm ntawm Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyooog Kawg los nkaus xwb los sis los ntawm cov uas nws tau muab cai rau lawv faib rau luag tej xwb.

“PEB POM TUS TSWV. . . .”

Hnub uas Eliyas rov los yog ib hnub Sunday thaum tav su, lub Plaub hlis ntuj hnub tim 3, 1836. Tau muaj ib txoj kev sib ntsib txais lub cim nco txog hauv lub Tuam Tsev Kirtland. Tus Yaj Saub piav txog lub sij hawm thaum tav su ntawd hais tias:

Thaum tav su, kuv tau pab lwm cov Thawj Tswj Hwm faib tus Tswv Rooj Mov rau lub Koom Txoos, txais nws los ntawm Pawg Kaum Ob Tug Thwj Tim, uas tau lub cib fim yuav ua hauj lwm ntawm lub rooj dawb ceev. Tom qab ua txoj hauj lwm no rau kuv cov kwv tij, kuv tau mus rau lub sam thiaj, daim ntaub thaiv tau ploj, thiab kuv tau qhau cev hlo, nrog Oliver Cowdery, nyob ntsiag to thov Vajtswv. Tom qab sawv ntawm kev thov Vajtswv, wb ob leeg tau ua yog toog pom li no.” (Q&K 110, lub hauv paus).

Daim ntaub thaiv raug tshem ntawm nkawd lub siab mus, thiab tau qhib nkawd qhov muag ntawm kev to taub.

Nkawd tau pom tus Tswv sawv rau ntawm nkawd xub ntiag nyob saum lub sam thiaj; txoj kev sab hauv nws ko taw yog kub, zoo nkaus li xim daj rhuv.

Nws ob lub qhov muag zoo li hluav taws; nws plaub hau dawb pawg zoo li daus; nws ntsej muag ci tshaj lub hnub; thiab nws lub suab nrov zoo li dej tsaws ntxhee, twb yog Yehauvas lub suab.

Tus Tswv hais tias Nws yog tus thawj thiab tus kawg; nws yog tus uas muaj txoj sia, nws yog tus uas luag muab tua pov tseg. Nws yog tus neeg sawv koj cev nrog Leej Txiv.

Nws hais tias nkawd tau kev zam txim rau nkawd tej kev txhaum thiab nkawddawb huv rau ntawm nws xub ntiag; yog li ntawd, nkawd yuav tsum muaj kev zoo siab.

Nws hais kom nkawd cov kwv tij tej siab muaj kev zoo siab, thiab nws cov neeg tej siab muaj kev zoo siab, cov uas tau siv lawv lub dag zog, ua lub tsev no rau nws lub npe.

Vim nws tau pom zoo rau lub tsev no, thiab nws lub npe yuav nyob no; thiab nws yuav muab siab hlub tshua qhia nws tus kheej rau nws cov neeg pom hauv lub tsev no.

Nws hais tias nws yuav tshwm rau nws cov qhev pom, thiab siv nws lub suab hais lus rau lawv, yog tias nws cov neeg yuav ceev nws tej lus txib, thiab tsis ua rau lub tsev dawb huv no ua chaw qias.

Nws hais tias ntau vam neeg tej siab yuav zoo siab vim tej koob hmoov nws yuav nchuav los, thiab vim lub vaj txiaj ntsim uas nws cov qhev tau txais hauv lub tsev no.

Nws hais tias lub tsev no yuav nrov moo rau pej kum teb chaws; thiab yog qhov koob hmoov xub thawj uas nws yuav nchuav rau nws cov neeg.

Tom qab ua yog toog pom li no tas, rooj ntug ceeb tsheej qhib rau Yauxej Xamiv thiab Oliver Cowdery saib dua. Mauxes tshwm los ntawm nkawd xub ntiag, thiab tau muab cov yuam sij ntawm txoj kev sau Ixayees los ua ke los ntawm plaub ces kaum hauv ntiag teb no, thiab coj kaum haiv neeg los ntawm qaum teb.

Tom qab no, Elias tau tshwm los thiab tau muab lub caij nyoog ntawm Anplaham txoj moo zoo rau nkawd, thiab hais tias nyob ntawm nkawd thiab nkawd xeeb leej xeeb ntxwv txhua tiam neeg tom qab ntawd yuav tau koob hmoov.

Tom qab ua yog toog pom li no tas, lwm txoj kev ua yog toog loj thiab tseem ceeb heev txawm qhib plho los; vim Eliyas tus uas yog tus yaj saub, tus uas raug coj mus saum ntuj ceeb tsheej yeej tsis tau saj kev tuag, sawv rau ntawm nkawd.

Nws hais tias twb txog sij hawm lawm, lub sij hawm uas Malakis tau hais txog—qhov uas nws hais tias [Eliyas] raug txib los, ua ntej hnuv tus Tswv los uas yog ib hnuv zoo thiab phem.

Nws tau los yuav tig leej txiv siab mus rau cov me tub me nyuam, thiab cov me nyuam mus rau leej txiv, tsam lub ntiag teb raug foom phem—



Чав Xilethi-aus, Salt Lake lub Tuam Tsev

Nws hais tias nkawd tau cov yuam sij ntawm lub caij nyoog no; thiab nkawd thiaj paub tias tus Tswv hnuv zoo thiab phem nyob ze lawm, twb nyob ntawm qhov rooj tos. (saib Q&K 110:1–16.)

Twb muaj lawm tiag! Lub ntiaj teb tsis quav ntsej qhov xwm tseem ceeb no, tiam sis nws yeej tseem ceeb rau txhua tus neeg uas tau muaj sia nyob los sis tseem yuav muaj sia nyob. Tej no pib kawj ntsiag to. Lub Koom Txoos tau pib ua ib lub koom txoos uas ua tej tuam tsev.

Hauv ntiaj teb no txawm pib muaj tej tus neeg thiab tej lub koom haum thiab tej pawg neeg uas nyiam nrhiav poj koob yawm txwv caj ces. Pib muaj li no txij thaum Eliyas tshwm sim los hauv Kirtland lub Tuam Tsev.

Txij lub Plaub hlis ntuj hnuv tim 3, 1836 los, cov me nyuam tau tig lawv tej siab rau lawv leej txiv. Tom qab no tej kab ke tsis nyob tib pliaj xwb, tiam sis nyob ruaj khov. Lub hwj chim muab sib khi nyob nrog peb. Tsis muaj lwm lub hwj chim uas siab tshaj lub no. Lub hwj chim no thiaj tau cai thiab yuav ua rau tej kab ke yuav nyob mus ib txhis hais rau ntawm tej kab ke uas ua raws kev raws cai rau neeg cial thiab neeg tuag tib si.

TXHUA YAM RAW S KEV RAW S CAI

Tom qab tej xwm tseem ceeb hauv Kirtland lub Tuam Tsev, kev cov nyom thiab kev tsim txom tau ua kom cov Neeg Ntseeg tsiv mus. Txawm lawv nyob qhov twg, tus Tswv tau qhia lawv ua tuam tsev li cas. Twb muaj li no hauv Independence thiab Far West, Missouri tib si. Nyob hauv lub caij no cov Neeg Ntseeg tau raug kev tsim txom hnyav kawg nkaus thiab lawv tau khiav mus nyob Nauvoo, Illinois. Nyob no kev tshwm sim tau los dua thiab lus txib kom ua tus Tswv ib lub tsev.

Tus Tswv piav tias lub ntsiab rau kev ua lub tsev yog kom qhia tej kab ke. Nws hais tias yuav tsum ua lub tsev no rau nws lub npe, xwv kom sab hauv nws muab tau nws tej kab ke rau nws cov neeg. Nws yuav qhia tej yam uas tau muab zais cia ntawm lub ntiaj teb txij thaum chiv keeb los rau kuv lub koom txoos pom, hais txog tej yam uas tseem ceeb rau lub caij nyoog kawg. (saib Q&K 124:40–41.)

Nws tau hais tias lub tuam tsev yuav ua chaw coj lawv tej kev pleev roj, thiab lawv tej kev ntxuav, thiab lawv tej kev cai raus dej rau cov neeg tuag, thiab lawv tej kev sab laj dawb huv, thiab lawv tej lub cim rau Livais cov tub tej kev txi, thiab lawv tej lus hais hauv tej chaw dawb huv tshaj, thiab lawv tej kev cai thiab tej kev txiav txim, rau zaj lus tshwm sim xub thawj thiab Xi-oos lub hauv paus, thiab rau lub yeeb koob, kev hwm, thiab kom txhua tus txais lub vaj txiaj ntsim,. . los ntawm txoj kab ke hauv kuv lub tsev dawb huv, uas nws tau txib nws cov neeg ua rau nws lub npe dawb huv. (saib Q&K 124:39.)

Tej kab ke uas peb ua hauv lub Koom Txoos yog: kev cai raus dej, lub cim nco txog, tis npe thiab foom koob hmoov rau me nyuam mos liab, thov Vajtswv rau neeg mob, tsa neeg ua tej hauj lwm hauv lub Koom Txoos, tsa neeg ua thawj coj. Txuas ntxiv rau yeej muaj tej kab ke siab dua, peb ua tej no hauv cov tuam tsev. Muaj tej yam xws li, kev ntxuav, kev pleev roj, lub vaj txiaj ntsim, thiab txoj kab ke muab sib khi, feem ntau peb hais tias kev sib yuav hauv lub tuam tsev.

Tej kab ke no tseem ceeb npaum li cas rau peb cov mej zeej hauv lub Koom Txoos?

Koj puas yuav tau kev zoo siab, koj puas yuav tau kev cawm dim, koj puas txais tau kev tsa nto yog tsis muaj tej no? Lus teb: Tej no ntau tshaj qhov xav tau, los sis qhov toob kas. Ntau tshaj qhov yus yuav tau los sis yuav tsum muaj. Tej no *tseem ceeb tshaj plaws* rau peb txhua tus.

Tus Yaj Saub Yauxej Xamiv hais tias luag tej pheej nug nws hais tias:

“Peb puas txais tau kev cawm dim yog peb tsis tau ua tej kab ke ntawd tag nrho?” Kuv yuav teb tias, Tsis Tau, txais tsis tau kev cawm seej tag nrho. Yexus tau hais tias, “Kuv txiv lub tsev muaj chaw ntau rau sawv daws nyob, kuv tab tom yuav mus tu chaw tseg cia rau nej nyob.” Tiag tiag mas lo lus *lub Tsev* yuav tau txhais hais tias lub nceeg vaj; thiab tus uas txais kev tsa nto nyob hauv qhov chaw siab tshaj yuav tsum ua raws txoj kev cai xilethi-aus, thiab txoj kev cai tag nrho. (*History of The Church of Jesus Christ of Latter-day Saints*, tus kws sau B. H. Roberts, 7 phau. [Salt Lake City: Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyoog Kawg, 1949], 6:184.)



Chav Xilethi-aus, San Diego California lub Tuam Tseu

Thawj Tswj Hwm Joseph Fielding Smith hais tias:

Kuv tsis khe koj ua txoj hauj lwm twg hauv lub Koom Txoos no, tej zaum koj yog ib tug thwj tim, los yog ib tug yawg suab, ib tug pov thawj hlob, los sis ib yam dab tsi los tau, koj txais tsis tau lub pov thawj hwj tag nrho tsuas yog koj mus rau hauv tus Tswv lub tuam tsev thiab txais tej kab ke uas tus yaj saub hais txog. Tsis muaj ib tug txiv neej twg uas txais tau lub pov thawj hwj tag nrho sab nraum tus Tswv lub tuam tsev. (Joseph Fielding Smith, *Elijah the Prophet and His Mission* [Salt Lake City: Deseret Book Co., 1957], phab 46.)

Peb twb hais txog tej kab ke siab uas peb ua hauv lub tuam tsev. Tej no muaj tej yam xws li lub vaj txiaj ntsim. Txoj kev txais vaj txiaj ntsim yog kev muab ntxiv, thiab muab ib yam dab tsi uas kav ntev thiab muaj nqi ntau heev rau. Lub tuam tsev lub vaj txiaj ntsim tej kab ke muaj peb yam rau: (a) Tus uas txais txoj kab ke tau hwj chim los ntawm Vajtswv los. "Cov uas txais tau ib lub hwj chim los saum ntuj los." (b) Tus uas txais kuj tau xov xwm thiab kev paub. "Lawv txais kev qhuab qhia txog tus Tswv tej lub ntsiab thiab tswv yim." (Bruce R. McConkie, *Mormon Doctrine*, phau 2 [Salt Lake City: Bookcraft, 1966] phab 227.) (c) Thaum muab sib khi rau ntawm lub thaj tus ntawd txais tej koob hmoov zoo kawg, hwj chim, thiab yeeb koob ua ib qho ntawm lub vaj txiaj ntsim.

Muaj ob nqe uas piav txog lub vaj txiaj ntsim, thawj nqe, Thawj Tswj Hwm Brigham Young tau hais:

Cia kuv piav me ntsis txog. Koj lub vaj txiaj ntsim yog kom koj txais txhua txoj kab ke hauv tus Tswv lub Tsev, uas koj yuav tsum muaj, xwv kom tom qab lub neej no, koj thiaj yuav mus nyob tau rau ntawm Leej Txiv xub ntiag, yuav dhau plaws cov tim tswv uas ua tub zov, yuav muab tau rau lawv cov lus tseem ceeb, cov cim hom thiab cim tuav, uas nyob hauv lub Pov Thawj Hwj Dawb Huv, thiab yuav txais kev tsa nto nyob mus txhis tab txawm lub ntiag teb thiab ntuj txiag teb tsaus. (*Discourses of Brigham Young*, comp. John A. Widtsoe [Salt Lake City: Deseret Book Co., 1971] phab 416.)

Txwj Laug James E. Talmage tau piav txog lub vaj txiaj ntsim hais tias:

Lub Tuam Tsev Vaj Txiaj Ntsim, hauv cov tuam tsev niaj hnuv nim no, muaj tej kev qhia txog tej yam tseem ceeb thiab muaj dab tsi hauv tej lub caij nyoog thaum ub thiab qhia vim li cas lub caij niaj hnuv no yog lub caij loj thiab tseem ceeb tshaj plaws rau tib neeg. Txoj kev qhia no rov qab hais txog tej yam tseem ceeb ntawm lub caij ntuj tsim teb raug, peb thawj khub niam txiv nyob li cas hauv lub Vaj Edees, nkawd kev tsis mloog lus thiab kev raug ntiab tawm ntawm qhov chaw xis nyob ntawd, nkawd nyob li cas hauv lub ntiaj teb kho siab thiab txom nyem kawg vim tau khwv thiab sib zog ua neej, txoj kev cawm dim uas theej tau qhov txhaum loj ntawd, lub caij thim txoj moo zoo, txoj kev muab Txoj Moo Zoo rov qab los kom muaj tej lub hwj chim thiab cai puag thaum ub dua, kev cai rau siab ua neeg dawb huv thiab qhov yog hauv lub neej no tseem ceeb npaum li cas, thiab kev coj nruj nraim raws Txoj Moo Zoo tej kev qhia. (James E. Talmage, *The House of the Lord* [Salt Lake City: Bookcraft, 1962], phab 99–100; tom qab no yuav hu ua *The House of the Lord*.)

Txwj Laug Talmage cov lus no qhia meej tias thaum koj txais lub vaj txiaj ntsim koj yuav txais kev qhia txog tus Tswv lub ntsiab thiab lub tswv yim uas qhia hais tias yog vim li cas nws thiaj tsim lub ntiaj teb thiab tib neeg. Koj yuav kawm tias koj yuav tsum ua li cas thiaj tau kev tsa nto.

Yuav tsum tau txoj koob hmoov ntawm lub vaj txiaj ntsim yog yus yuav tau kev tsa nto tag nrho. Txhua tus Neeg Ntseeg hauv Hnuv Nyoog Kawg yuav tsum rau siab coj nws lub neej kom tsim nyog txais thiab yuav txoj koob hmoov no.

Feem ntau tej kab ke ntxuav thiab pleev roj hauv lub tuam tsev hu ua tej kab ke chiv thawj. Yuav txaus siab yog tias peb tsuas hais tias: Nyob nrog lub vaj txiaj ntsim muaj tej kev ntxuav thiab pleev roj—muaj ntau lub cim qhia, tiam sis cog lus tias yuav tau tej koob hmoov tam sim no thiab yav tom ntej.

Txuas rau tej kab ke no, hauv lub tuam tsev koj yuav tau hnav cev tsoos tsho thiab tau kev cog lus tias yuav tau koob hmoov vim cev tsoos tsho no. Qhov tseem ceeb mas koj yuav tsum ua tib zoo mloog thaum txais tej kab ke no thiab sim nco ntsoov tej koob hmoov yus tau thiab yuav tsum ua li cas thiaj tau raws li hais.

Txoj kab ke muab sib khi yog txoj kab ke uas muab tej yim neeg khi ua ke mus ib txhis. Kev sib yuav hauv lub tuam tsev yog txoj kab ke muab sib khi. Thaum ib khub niam txiv raug khi ua ke hauv lub tuam tsev tom qab tau sib yuav raws tseem fvw cai cov me nyuam uas tau yug los ua ntej lub sij hawm ntawd, thiab yog li ntawd tsis tau yug los hauv kev sib khi lus, raug muab khi rau nkawd hauv ib txoj kab ke dawb ceev.

Thov kom koj ua tib zoo npaj koj lub neej kom raws kev raws cai. Tsuas muaj tau li no tom qab koj tau txais lub tuam tsev tej koob hmoov, tej kab ke, vim nyob hauv tej kab ke ntawd, yus pom Vajtswv lub hwj chim. (saib Q&K 84:20)

TEJ KEV KHI LUS DAWB CEEV

Tus Tswv hauv kev tshwm sim uas niaj hnuv no yog tshooj 132 hauv Phau Qhuab Qhia thiab Khi Lus tau tshwm sim ib txoj kev khi lus tshiab uas nyob mus ib txhis.

Nws hais tias yog peb tsis ua raws li kev khi lus ntawd, ces peb yuav raug foom phem; vim tsis muaj leej twg uas xyeej tau kev khi lus no pov tseg thiab yuav nkag tau rau hauv nws lub yeeb koob.

Cov uas yuav tau tus Tswv ib txoj koob hmoov yuav tsum ua raws kev cai rau txoj koob hmoov ntawd, thiab kab li kev cai ntawd, twb muaj txoj kev cai ua ntej tsim lub ntiaj teb lawm. (saib Q&K 132:4–5.)

Thawj Tswj Hwm Joseph Fielding Smith piav tias kev khi lus tshiab uas nyob mus ib txhis txhais tau li no:

Kev khi lus tshiab uas nyob mus ib txhis yog dab tsi? Kuv tu siab vim muaj ib co mej zeej hauv lub Koom Txoos uas raug qhia yuam kev thiab tsis to taub kev khi lus tshiab uas nyob mus ib txhis yog dab tsi tiag tiag. *Kev khi lus tshiab uas nyob mus ib txhis yog txoj moo zoo tej kev khi lus thiab kev cog lus tag nrho.* (Joseph Fielding Smith, *Doctrines of Salvation*, 3 phau ntawv [Salt Lake City: Bookcraft, 1954–56], 1:156; tom qab no hu ua *Doctrines of Salvation*.)

Kev khi lus no suav txhua txoj kab ke ntawm txoj moo zoo—cov siab tshaj tau ua hauv lub tuam tsev. Yuav hais Thawj Tswj Hwm Smith cov lus dua hais tias:

Nim no yeej muaj lus meej meej qhia txog kev khi lus tshiab uas nyob mus ib txhis. *Nws yog txhua yam tsav—txoj moo zoo tag nrho*. Ces kev sib yuav uas ua raws kev cai, kev cai raus dej, kev tsa rau lub pov thawj hwj, txhua yam ntxiv—*txhua txoj kev sib cog lus, txhua txoj kev lav lus, txhua txoj kab ke hauv Yexus Khetos txoj moo zoo, uas raug khi raws txoj kev cai no los ntawm tus Ntsuj Plig Dawb Huv ntawm kev cog lus, yeej yog ib qho ntawm kev khi lus tshiab uas nyob mus ib txhis*. (*Doctrines of Salvation*, 1:158.)

Nyob hauv nqe vaj lug kub uas tau hais lawm (Phau Qhuab Qhia thiab Khi Lus 132:4) tus Tswv tau hais meej meej ces yus yuam kev tsis tau tias tsis muaj leej twg uas xyeej tau kev khi lus no pov tseg thiab yuav nkag tau rau hauv kuv lub yeeb koob.

Cov uas mus rau lub tuam tsev muaj lub cib fim yuav txais tej kev khi lus thiab kev lav lus txog lawv kev tsa nto thiab rau lwm cov neeg thiab. Txwj Laug James E. Talmage sau tias:

Tej kab ke ntawm lub vaj txiaj ntsim hais kom tus neeg ntawd ua ob peb yam, xws li khi lus thiab cog lus tias yuav ua raws kev cai tsim txiaj thiab kev coj dawb huv, ua neeg muaj kev siab hlub, neeg zoo, ua siab ntev thiab dawb huv, rau siab siv tej kev txawj thiab nyiaj txiag pab tshaj tawm qhov tseeb thiab pab tib neeg sawv daws; rau siab ntso ua qhov tseeb; thiab siv zog pab npaj lub ntiaj teb tos txais nws tus Vaj Ntxwv,—tus Tswv Yexus Khetos. Thaum txais txhua txoj kev khi lus thiab ua raws txhua txoj hauj lwm yus yuav tau koob hmoov, yog yus rau siab ua raws tej kev cai ntawd. (*The House of the Lord*, phab 100.)

Peb khi lus nrog tus Tswv tias peb yuav siv peb lub sij hawm, kev txawj, thiab lub dag zog rau Nws lub nceeg vaj.

Peb yog ib co neeg muaj kev khi lus. Peb khi lus tias peb yuav siv peb lub sij hawm thiab nyiaj txiag thiab kev txawj—tej uas peb yog thiab tej peb muaj—pab ntxiv qhov zoo rau Vajtswv lub nceeg vaj hauv lub ntiaj teb. Hais tiag mas, peb khi lus tias yuav ua qhov zoo. Peb yog ib co neeg muaj kev khi lus, thiab lub tuam tsev nyob nruab nrab ntawm peb tej kev khi lus. Nws yog lub hauv paus rau kev khi lus.

Los rau hauv lub tuam tsev. Koj yuav tau los rau hauv lub tuam tsev. Nyob no koj sawv lwm tus uas tau tuag lawm cev, koj yuav rov tshab tej kev khi lus uas koj tau khi lawm. Koj

yuav rov qab kawm txog tej koob hmoov ntawm sab ntsuj plig uas nyob hauv tus Tswv lub tsev.

Rau siab ua raws tej kev khi lus thiab kab ke ntawm txog moo zoo. Cia li ua zoo txaus kom yus thiaj tsim nyog txais tej kab ke dawb ceev ntawd thaum koj peem mus ua neej nyob. Qhia kev hwm rau tej kev khi lus ntawd. Ua li no thiab koj yuav zoo siab.

Koj lub neej thiaj yuav raws kev raws cai—txhua yam raws tus txheej txheem yog, muaj kab muaj kev, thiab nyob hauv chaw yog. Koj tsev neeg yuav nyob hauv ib yam uas plam tsis tau.

Tej koob hmoov koj tau hauv lub tuam tsev dawb huv yeej nyob hauv tej kev khi lus thiab kab ke. Muaj tseeb tiag tus Tswv zoo siab heev thaum peb tsim nyog tau lub npe: Ib tug neeg ceev tej kev khi lus.

YEEJ MUAJ KEV TAWM TSAM

Cov tuam tsev ua lub hauv paus thiab lub zog ntawm sab ntsuj plig hauv lub Koom Txoos. Peb yuav tsum paub hais tias dab ntxwg nyoog yuav sim tawm tsam peb lub Koom Txoos thiab peb txhua tus thaum peb sim ua txoj hauj lwm dawb ceev no. Kev tawm tsam no ua tau tej kev tsim txom hnyav kawg zoo li thaum ub los sis yog kev tsis xav rau siab ua. Qhov kawg no muaj kev xwm txheej ntau dua thiab yog kev tawm tsam lub tuam tsev txoj hauj lwm.

Muaj ntau txoj kev tawm tsam lub tuam tsev txoj hauj lwm vim nws twb yog qhov uas ntxiv hwj chim ntawm sab ntsuj plig ntau tshaj rau Haiv Neeg Ntseeg hauv Hnub Nyoog Kawg, thiab rau tag nrho lub Koom Txoos.

Thaum muab lub ces kaum pob zeb ntawm Logan lub Tuam Tsev fij rau Vajtswv, Thawj Tswj Hwm George Q. Cannon hais li no tias:

Txhua lub pob zeb uas tau pua ua hauv paus rau ib lub Tuam Tsev, thiab txhua lub Tuam Tsev uas ua tiav raws li tus Tswv tau qhia tseg rau Nws lub Pov Thawj Hwj dawb huv, ua rau Ntxwg Nyoog lub hwj chim hauv ntiaj teb no qaug zog me ntsis, thiab ntxiv zog rau Vajtswv lub hwj chim thiab tej zoo li Vajtswv, nws txav lub ntuj ceeb tsheej ua ib lub hwj chim uas pab peb, nws thov thiab hu Vajtswv Tus Nyob Mus

Ib Txhis, thiab cov uas nrog nws nyob tej koob hmoov los saum ntu los rau peb. (Hauv “The Logan Temple, *Millennial Star*, Kaum Ib hlis tim 12, 1877, phab 743.)

Thaum cov mej zeej ntawm lub Koom Txoos muaj kev kub ntxhov los sis thaum tej kev txiav txim tseem ceeb los txob lawv siab, feem coob yuav mus rau lub tuam tsev. Nws yog ib qho chaw zoo coj peb tej kev nyuaj siab mus rau. Nyob hauv lub tuam tsev peb txais tau tswv yim ntawm sab ntsuj plig. Nyob ntawd, thaum peb ua hauj lwm hauv lub tuam tsev, peb nyob “sab nraum lub ntiaj teb.”

Tej lub sij hawm no muaj nuj nqis ntau vim peb tab tom ua ib yam dab tsi rau ib tug neeg uas ua tsis tau rau nws tus kheej. Thaum peb ua lub vaj txiaj ntsim rau ib tug neeg uas tau tuag lawm, peb tsis txaj muag thov tus Tswv pab peb. Thaum tej khub niam txiv hluas muaj tej kev txiav txim, yog lawv nyob ze ib lub tuam tsev, kev mus rau hauv muaj nuj nqis ntau. Tus ntsuj plig hauv lub tuam tsev muaj ib txoj kev ua kom dawb huv thiab qhia qhov tseeb.

Tej thaum peb muaj teeb meem ntau, thiab muaj ntau yam uas txob peb lub siab, ces peb xav thiab pom tsis meej. Tom lub tuam tsev zoo nkaus li tej kev txob no ploj mus lawm, kev nyuaj siab raug tshem tawm, thiab peb ho “pom” tau tej yam uas peb tsis tau pom dua thiab nrhiav tau kev kov yeej peb tej teeb meem uas peb tsis tau paub dua.

Tus Tswv yuav foom koob hmoov rau peb thaum peb ua tej kab ke dawb ceev hauv lub tuam tsev. Tej koob hmoov yuav tsis nyob ntawm peb txoj kev ua hauj lwm hauv lub tuam tsev xwb. Peb yuav tau koob hmoov hauv txhua yam tsav ntawm peb lub neej. Peb yuav tsim nyog txais tus Tswv kev pab ntawm sab ntsuj plig thiab sab cev nqaij daim tawv tib si.

MUS RAU DAIM NTAUB THAIV

Peb yuav tsum to taub tias yog vim li cas peb ua cov tuam tsev, thiab ua li cas peb yuav tsum ua tej kab ke. Tom qab ntawd peb pheej tau kev qhia thiab to taub ntxiv txog tej yam tseem ceeb ntawm sab ntsuj plig. Kev qhia no los ib nqes rau ib nqes, ib zag rau ib zag zuj zus, txog thaum peb tau qhov kaj thiab kev paub txhua nrho. Qhov no yuav pov hwm peb—peb

txhua leej txhia tus. Nws kuj yog ib qho pov hwm lub Koom Txoos thiab.

Tsis muaj dua lwm txoj hauj lwm uas pov hwm lub Koom Txoos npaum lub tuam tsev tej hauj lwm thiab kev nrhiav caj nrhiav ceg uas txhawb nqa nws. Tsis muaj dua lwm txoj hauj lwm uas txhawb pab yus tus ntsuj plig npaud. Tsis muaj dua lwm txoj hauj lwm uas ntxiv hwj chim rau peb npaud. Tsis muaj dua lwm txoj hauj lwm uas tsa kev cai rau kev ua ncaj ncees siab npaud.

Peb tej hauj lwm hauv lub tuam tsev muaj ib daim tiv thaiv thiab pov hwm npog peb, hais txog peb txhua tus thiab peb haiv neeg.

Nyob hauv lub tuam tsev tej kab ke peb thiaj khi lus nrog Nws—nyob no peb rais los mus ua cov neeg muaj kev khi lus.

Yog tias peb zoo siab txais kev tshwm sim txog lub tuam tsev tej kab ke, yog tias peb tsis txaj muag txog peb tej kev khi lus, tus Tswv yeej yuav pov hwm peb. Peb yuav txais kev tshwm sim txaus peb kov yeej tej teeb meej hauv lub neej no.

Tej hauj lwm hauv lub tuam tsev muaj tseeb tiag. Tau tshwm sim los ntawm sab nraum daim ntaub thaiv thiab kev tshwm sim tseem tab tom los.

Kev tshwm sim txog lub tuam tsev tej hauj lwm yeej los tau rau txhua tus mej zeej ntawm lub Koom Txoos.

Ces cia li los rau hauv lub tuam tsev—los thiab txais koj tej koob hmoov. Nws yog ib txoj hauj lwm dawb ceev.



YEXUS KHETOS

LUB KOOM TXOOS
NTAWM TSOOM
HAIV NEEG NTSEEG
HAUV HNUB NYOOG KAWG

HMONG



36793 295